

00392

欽定舊唐書

卷一百七十九之一百八十六上

欽定四庫全書

卷一百一十五

舊唐書卷一百七十九

後 晉 司 空 同 中 書 門 下 平 章 事 劉 昫撰

列傳第一百二十九

蕭 遘 孔 緯 韋 昭 度 崔 昭 緯 張 濬 朱 朴 鄭 繁

劉 崇 望

兄崇龜弟崇魯崇謨

徐 彥 若

陸 晟

柳 璨

蕭遘蘭陵人開元朝宰相太師徐國公嵩之四代孫嵩生衡衡生復德宗朝宰相復生湛湛生實咸通中宰相實生遘以咸通五年登進士第釋褐祕書省校書郎太原從事入朝爲右拾遺再遷起居舍人與韋保衡同年登進士第保衡以幸進無藝同年門生皆薄之遘形神秀偉志操不羣自比李德裕同年皆戲呼太尉保衡心銜之及保衡作相持遘之失貶爲播州司馬途經三峽維舟月夜賦詩自悼慮保衡見害遽有神人謂之曰相公勿憂予當禦侮奉衛遘心異之過峽州經白帝祠卽所覩之神人也保衡誅以禮部員外郎徵還轉考功員外郎知制誥乾符初召充翰林學士正拜中書舍人累遷戶部侍郎翰林承旨黃巢犯闕僖宗出幸以供饋不給須近臣掌計改兵部侍郎判度支中和元年三月自褒中幸成都次綿州以本官同平章事加中書侍郎累兼吏部尙書監修國史遘少質大節以經濟爲己任洎處台司風望

尤峻奏對朗拔天子器之光啟初王綱不振是時天下諸侯半出羣盜強弱相噬怙衆邀寵國法莫能制有李凝古者從支詳爲徐州從事詳爲衙將時溥所逐而賓佐陷於徐及溥爲節度使因食中毒而惡凝古者譖之云爲支詳報讐行酖溥收凝古殺之凝古父損時爲右常侍溥上章披訴言損與凝古同謀內官田令孜受溥厚賂曲奏請收損下獄中丞盧渥附令孜鍛鍊其獄侍御史王華嫉惡堅執奏證損無罪令孜怒奏移損付神策獄按問王華拒不奉詔奏曰李損位居近侍當死卽死安可取辱於黃門之手遭非時進狀請開延英奏曰李凝古行酖之謀其事曖昧已遭屠害今不復論李損父子相別三四年音問斷絕安得誣罔同謀時溥恃勳壞法凌蔑朝廷而抗表請按侍臣悖戾何甚厚誣良善人皆痛心若李損羅織而誅行當便及臣等帝爲之改容損得免止於停任時田令孜專總禁軍公卿寮庶無不候其顏色唯遵以道自處未嘗屈降是年冬令孜奏安邑兩池鹽利請直屬禁軍王重榮上章論列乃奏移重榮別鎮重榮不受令孜請率禁軍討之重榮求援於太原李克用引軍赴之拒戰沙苑禁軍大敗逼京城僖宗懼出幸鳳翔諸藩上章抗論令孜生事離間方面遵素惡令孜乃與裴澈致書召朱玫玫以邠州之軍五千迎駕仍與河中太原修睦請同匡王室由是諸鎮繼上章請駕還京令孜聞玫軍至迫脅天子幸陳倉時僖宗倉卒出城夜中百官不及扈從玫怒令孜弄權又以天子不諒其忠語辭怨望乃訴于遵曰主上

六年奔播百端艱險中原士庶與賊血戰肝腦塗地十室九空比至收復京都十亾七八殘民遭老方喜車駕歸宮主上不念生靈轉輸之勞甲士血戰之效將勸王之功業爲勅使之寵榮而更志在亂邦與國生事召戎結怨不自他人昨奉指蹤徑來奔問不蒙見信翻類脅君古者忠而獲罪正如此也吾等報國之心極矣戰賊之力殫矣安能垂頭疊翼喘喘於閹寺之手哉春秋之義喪君有君相公徐思其宜改圖可也邁曰主上臨御十餘年未聞過行比來喪亂播越失於授任非才近年令孜擊肘動不如意上每言之流涕不已昨去陳倉上無行意令孜陳兵帳下列卒堦前造次迫行不容俟旦靜言此賊罪不容誅至尊之心孰不深鑒足下乃心王室止有歸兵還鎮拜表迎鑾德業功名益光圖史捨此已往理或未安改圖之言未敢聞命孜曰李家王子極多有天下者豈一王哉邁曰廢立危事雖有伊尹霍光之賢尙貽後悔古人云勿爲福始勿爲禍先如公矢謀未見其利孜退而宣言曰我冊箇王子爲主不從者斬及立襄王請邁爲冊文邁曰少嬰衰疾文思減落比來禁署未免倩人請命能者竟不措筆乃命鄭昌圖爲之致滋不悅及還長安以昌圖代邁爲相署邁太子太保乃移疾滿百日退居河中之永樂縣邁在相位五年累兼尙書右僕射進封楚國公僖宗再還京宰相孔緯與邁不協以其受僞命奏貶官尋賜死於永樂咸通中王鐸掌貢籍邁與韋保衡俱以進士中選而保衡暴貴與鐸同在中書及僖宗在蜀邁又與鐸並居

相位帝嘗召宰臣鐸年高昇階足跌踣勾陳中邁旁掖起帝目之喜曰輔弼之臣和予之幸也謂邁曰適見卿扶王鐸予喜卿善事長矣邁對曰臣扶王鐸不獨司長臣應舉歲鐸爲主司以臣中選門生也上笑曰王鐸選進士朕選宰相於卿無負矣邁謝之而退邁爲大臣士行無缺逢時不幸爲僞愠所污不以令終人士惜之弟邁時爲永樂令

孔緯字化文魯曲阜人宣尼之裔曾祖岑父位終祕書省著作佐郎諫議大夫巢父兄也祖幾位終禮部尙書自有傳父遵孺終華陰縣丞緯少孤依諸父溫裕溫業皆居方鎮與名公交故緯聲籍早達大中十三年進士擢第釋褐祕書省校書郎崔慎由鎮梓州辟爲從事又從崔鉉爲揚州支使得協律郎崔慎由鎮華州河中緯皆從之歷觀察判官宰相楊收奏授長安尉直弘文館御史中丞王鐸奏爲監察御史轉禮部員外郎宰相徐商奏兼集賢直學士改考功員外郎丁內憂免服闋以右司員外郎入朝宰相趙隱嘉其能文薦爲翰林學士轉考功郎中知制誥賜緋正拜中書舍人累遷戶部侍郎謝日面賜金紫之服乾符中罷學士出爲御史中丞緯器志方雅嫉惡如讐旣總憲綱中外不繩而自肅歷戶部兵部吏部三侍郎居選曹動循格令權要有所託私書盈几不之省執政怒之改太常卿黃巢之亂從僖宗幸蜀改刑部尙書判戶部事宰相蕭遘在翰林時與緯情旨不協至是因戶部取給不充移之散秩改太子少保光

敗元年從駕還京是時田令孜軍敗沙陀逼京師帝移幸鳳翔帥朱玫引兵來迎駕令孜挾帝幸山南
時中夜出幸百官不及扈從而隨駕者黃門衛士數百人而已帝駐寶雞候百官詔授緯御史大夫遣中
使傳詔令緯率百寮赴行在時京師急變從駕官屬至整厓並爲亂兵所剽資裝殆盡緯承命見宰相論
事蕭遺裴澈以田令孜在帝左右意不欲行辭疾不見緯緯遣臺吏促百官上路皆以袍笏不具爲詞緯
無如之何乃召三院御史謂之曰吾輩世荷國恩身居憲秩雖六飛奔迫而咫尺天顏累詔追徵皆無承
稟非臣子之義也凡布衣交舊緩急猶相救卹況在君親策名委質安可背也言竟泣下三院曰夫豈不
懷但整厓剽剝之餘乞食不給今若首途聊營一日之費俟信宿繼行可也緯拂衣起曰吾妻危疾旦不
保夕丈夫豈以妻子之故怠君父之急乎公輩善自爲謀吾行決矣卽日見李昌符告曰主上再有詔命
令促百寮前進觀羣公立意未有發期僕忝憲聞不宜居後道途多梗明公幸假五十騎送至陳倉昌符
嘉之謂緯曰路無頓遞裹糧辦耶乃送錢五十緡令騎士援緯達散關緯知朱玫必蓄異志奏曰關城小
邑不足以駐六師請速幸梁州翌日車駕離陳倉纔入關而郿岐之兵圍寶雞攻散關微緯之言幾危矣
至褒中改兵部侍郎同中書門下平章事尋改中書侍郎賢集殿大學士王行瑜斬朱玫平定京城還門
下侍郎監修國史從駕還京駐蹕岐陽進階特進兼吏部尙書領諸道鹽鐵轉運使車駕還宮進位左僕

射賜持危啟運保乂功臣食邑四千戶食實封二百戶賜鐵券恕十死罪賜天興縣莊善和里宅各一區兼領京畿營田使僖宗晏駕充山陵使僖宗祔廟緯準故事不入朝昭宗遣中使召赴延英令緯依舊視事進加司空以國學盜火所焚令緯完葺仍兼領國子祭酒蔡賊秦宗權伏誅進階開府儀同三司進位司徒封魯國公十一月昭宗謁郊廟兩中尉內樞密請朝服所司申前例中貴人無例朝服助祭之禮少府監亦無素製冠服中尉怒立令製造下太常禮院禮官舉故事亦稱無中尉朝服助祭之文諫官亦論之緯奏曰中貴不衣朝服助祭國典也陛下欲以權道寵內臣則請依所兼之官而爲之服天子召諫官謂之曰大禮日近無宜立異爲朕容之於是內官以朝服助祭郊禮畢進位兼太保大順元年夏幽州汴州請討太原宰臣張濬請自率禁軍爲招討上持疑未決問計於緯緯以討之爲便語在濬傳其年秋濬軍爲太原所擊大敗而還濬罷相貶官緯坐附濬以檢校太保江陵尹荆南節度觀察等使未離闕下再貶均州刺史緯濬密遣人求援於汴州朱全忠上章論救緯至商州有詔俾令就便遂寓居華州乾寧二年五月三鎮入京師殺宰相韋昭度李谿帝以大臣朋黨外交方鎮忠用骨鯁正人遣中使趨華州召緯入朝以疾未任上路六月授太子賓客其日之夕改吏部尙書翌日拜司空兼門下侍郎同平章事太清宮使修奉太廟弘文館大學士延資庫使階爵功臣名食邑並如故旬日之內驛騎敦促相望于路扶疾

至京師延英中謝奏曰臣前時得罪宰相智術短淺有負弼諧陛下特貸刑書曲全腰領臣期於死報泉壤不望生叩玉階復拜龍顏實臣榮幸然臣比嬰衰疾伏枕累年形骸雖存生意都盡平居勉強御事猶疎況比厯歲寧勝重委國祚方泰英彥盈庭豈以朽腐之人再塵機務臣力疾一拜殿庭乞陛下許臣自便因嗚咽流涕緯久疾拜蹈艱難上令中使止之改容軫念令閤門使送緯中書視事不旬日沙陀次河中同州王行約入京師謀亂天子出幸石門緯從駕至莎城疾漸危篤先還京城九月卒於光德里第贈太尉緯家尚節義挺然不屈雖權勢熾灼未嘗假以恩禮大順初天武都頭李順節恃恩頗橫不期年領浙西節度使俄加平章事謝日臺吏申中書稱天武相公衙謝準例班見百寮緯判曰不用立班順節驕暴小人不閑朝法盛飾趨中書既見無班心甚怏怏他日因會順節微言之緯曰必知公慊也夫百辟卿士天子庭臣也比來班見宰相以輔臣居班列之首奉長之義也公握天武健兒而於政事廳受百寮班見意自安乎必若須此儀俟去都頭二字可也順節不敢復言其秉禮不回多此類也孔氏自元和後昆仲貴盛至正卿方鎮者六七人未有爲宰輔者至緯始在鼎司子崇弼亦登進士第仕至散騎常侍

韋昭度字正紀京兆人祖縉父逢昭度咸通八年進士擢第乾符中累遷尚書郎知制誥正拜中書舍人從僖宗幸蜀拜戶部侍郎中和元年權知禮部貢舉明年以本官同平章事兼吏部尚書昭宗卽位閬州

刺史王建攻陳敬瑄於成都隔絕貢奉乃以昭度檢校司空同平章事成都尹劍南西川節度招撫宣慰等使昭度赴鎮敬瑄不受代詔東川顧彥朗與王建合勢討之昭度爲行營招討卒歲止拔漢州王建謂昭度曰相公勞師弊衆遠事蠻夷訪問京洛以東羣侯相噬禍難未已朝廷不治腹心之疾也相公宜亟還京師咨謀匡合平定兩河國家之利也敬瑄小醜以日月制之擒之必矣此事責建可辦昭度然之奏請還都昭度未及京師建以重兵守劍門急攻成都下之殺敬瑄自稱留後昭度還以檢校司空充東都留守召還爲右僕射景福二年冬宰相杜讓能爲鳳翔所殺復委昭度知政事與李谿並命時宰相崔昭緯專政惡李谿之爲人降制日令知制誥劉崇魯哭麻以沮之谿上表論列天子待谿益厚明年春復命谿同平章事昭緯不勝其忿先是邠州王行瑜求爲尙書令昭度奏議云國朝已來功如郭子儀未省曾兼此官乃賜號尙父崔昭緯宗人鋌曾爲行瑜從事朝廷每降制勅不便於昭緯者卽令鋌訴於行瑜俾上章論列朝旨小有依違卽表章不遜至是李谿入拜昭緯謂鋌曰前時尙父之命已行而昭度沮之今又引谿同列此人姦纖惑上視聽宗社不寧恐復有杜太尉之事行瑜與李茂貞上章言命相非其人懼危宗社天子優詔曉諭言谿有才其年五月行瑜茂貞華州韓建以兵入覲面奏昭度李谿之姦邪請加譴逐制勅未行三鎮兵害昭度於都亭驛及行瑜誅降制復其官爵令其家收葬

崔昭緯清河人也祖庇滑州酸棗縣尉父瓌鄂州觀察使昭緯進士及第昭宗朝歷中書舍人翰林學士戶部侍郎同平章事性姦纖忌前達內結中人外連藩閫屬朝廷微弱每託援以凌人主昭宗明察心不能堪以誘召三鎮將兵詣闕賊殺宰相內臣帝深切齒會太原之師誅行瑜罷相授右僕射後又以託附汴州再貶梧州司馬尋降制曰崔昭緯頃居內署粗著微勞擢於侍從之司委以燮調之任不能忠貞報國端慎處身潛交結於姦臣致漏泄於機事星霜累換匡輔蔑聞爾罪一也又快其私忿輒恣陰謀託崔鋌之險讎連行瑜之計畫遂致稱兵向闕怙衆脅君故宰臣韋昭度李谿並以無辜見害幾危宗社顯辱君親爾罪二也及行瑜敗滅京國甫安而乃自懼欺誣別謀託附又於藩閫潛請薦論不唯苟免罪愆兼亦再希任用貪榮冒寵僭濫無厭敗俗傷風賢愚共鄙爾罪三也又將厚賂欲結諸王輕侮我憲章玷瀆我骨肉貨財之數文字具存賴諸王作朕腹心嫉其蠹害盡將昭緯情款兼其親吏姓名直具奏聞拒其求託昭緯會居宰輔久歷清崇但欲逞其回邪都不顧其事體觀其識見實駭聽聞爾罪四也自姦邪既露情狀難容尙示寬刑未行嚴憲投于荒裔冀其自新而不能退省過尤恭承制命速赴貶所用守常規而猶自務宴安尋聞所在留駐攪擾藩鎮侮慢朝章曾無稟畏之心可驗苞藏之計罔知懲咎唯謗朝廷爾罪五也朕以恩澤者帝王之雨露刑法者邦國之雷霆無雨露則庶物不榮無雷霆則萬邦不肅朕體

天道以化育遵王度以澄清罪既昭彰理難含垢凡百多士宜體予懷宜所在賜自盡時昭緯行次至荆南中使至斬之兄昭符仕至禮部尙書昭愿太子少保昭矩給事中昭達考功員外郎

張濬字禹川河間人祖仲素位至中書舍人父鑠官卑家寓州濬倜儻不羈涉獵文史好大言爲士友之所擯弃初從鄉賦隨計咸薄其爲人濬憤憤不得志乃田衣野服隱於金鳳山學鬼谷縱橫之術欲以掉闔取貴仕乾符中樞密使楊復恭因使過之自處士薦爲太常博士累轉度支員外郎黃巢將逼關輔濬託疾請告侍其母挈族避亂商州賊犯京師僖宗出幸途無供頓衛軍不得食漢陰令李康獻糲餌數百騾綱軍士始得食僖宗召康問曰卿爲縣令安操心及此康對曰臣爲塵吏敢有此進獻張濬員外教臣也帝異之急召至行在拜兵部郎中未幾拜諫議大夫其年冬宰相王鐸至滑臺兼充天下行營都統方徵兵諸侯奏用濬爲都統判官時王敬武初破弘霸郎軍威大振累詔徵平盧兵敬武獨不赴援鐸遣濬往說之敬武已受僞命復怙強不迎詔使濬至謁見責之曰公爲天子守藩王臣齎詔宣諭而侮慢詔使既未識君臣禮分復何顏以御軍民哉敬武愕然謝咎既宣詔軍士按兵默然濬並召將佐集於鞠場而諭之曰人生效忠仗義所冀粗分順逆懸知利害黃巢前日販鹽虜耳公等捨累葉天子而臣販鹽白丁何利害之可論耶今諸侯勸王天下響應公等獨據一州坐觀成敗賊平之後去就何安若能此際排難

解紛陳師鞠旅共誅寇盜迎奉鑾輿則富貴功名指掌可取吾惜公輩捨安而卽危也諸將改容引過謂
敬武曰諫議之言是也卽時出軍從潛入援京師賊平累遷戶部侍郎僖宗再幸山南拜平章事判度支
潛初發迹依楊復恭及復恭失勢乃依田令孜以至重位而反薄復恭及再幸山南復恭代令孜爲中尉
罷潛知政事昭宗初在藩邸深嫉宦官復恭有援立大勳恃恩任事上心不平之當時趨向者多言潛有
方略能畫大計復用爲宰相判度支上嘗問潛致理何事最急對曰莫若強兵兵強而天下服上繇是專
務蒐補兵甲欲以武功勝天下後延英論前代爲治得失潛曰不必遠徵漢晉之弊臣竊見陛下春秋鼎
盛英睿如此內外偏於強臣每思之實痛心而泣血也會朱全忠誅秦宗權安居受殺李克恭以潞州
降全忠幽州李匡威雲州赫連鐸等奏請出軍討太原詔四品以上官議皆言國祚未安不宜生事假如
得太原亦非國家所有潛議曰先帝頻至播越王室不寧原其亂階由克用全忠之矛盾也請因其奏乘
全忠立功可斷兩雄之勢上曰收復之功克用第一今乘其危困而加兵諸侯其謂我何潛懇論用兵之
利害蓋欲示外勢而擠復恭也上旨未決宰臣孔緯曰張潛所陳萬代之利也陛下所惜卽日之利也以
臣所料師渡河而賊必自破昨計度軍中轉餉犒勞一二年間必無闕事陛下斷意行之旣二相俱論乃
以潛爲河東行營兵馬都招討宣慰使以京兆尹孫揆副之仍授揆昭義節度使華州韓建爲供軍使朱

全忠爲太原西南面招討使李匡威赫連鐸爲東北面招討使全忠以汴軍三千爲潞牙隊大順元年六月潞率軍五十二都兼邠寧鄜夏雜虜共五萬人騎發自京師昭宗御安喜樓臨送潞酒酣泣奏曰陛下勳爲賊臣掣肘臣所以誓死憤惋爲陛下除其僭倖楊復恭聞之不悅中尉內使餞於長樂復恭奉卮酒屬潞潞辭曰聖人賜酒已醉矣復恭戲曰相公握禁兵擁大旆獨當一面不領復恭意作面子耶潞笑曰賊平之後方見面子復恭銜之時汴華邠岐之師渡河會潞於晉州汴將朱崇節權知潞州事太原將李存孝攻之潞慮賊平汴人據昭義乃令孫揆分兵赴鎮中使韓歸範送旌節至軍八月揆與歸範赴潞州至潞並爲存孝擒送太原九月汴將葛從周奔潞州十月潞軍至陰地邠岐華三鎮之師營平陽李存孝擊之一戰而敗委兵仗潰散進攻晉州數日中夜潞斂衆遁走比曙喪師殆半存孝進收晉絳懿隰等州潞狼狽由含山踰王屋出清河折屋木縛筏濟河部下離散將盡李克用上章論訴曰晉州長監關使張承暉於當道錄到張潞榜并詔曰張潞充招討制置使令率師討臣兼削臣屬籍官爵者臣誠冤憤頓首頓首伏以宰臣張潞欺天蔽日廊廟不容讒臣於君奪臣之位憑燕帥妄奏與汴賊結恩矯託皇威擅宣王命徵集師旅撓亂乾坤悞陛下中興之謀資黔黎重傷之困臣實何罪而陛下伐之此則宰臣持權面欺陛下況臣父子三代受恩四朝破徐方救荆楚收鳳闕碎梟巢致陛下今日冠通天之冠佩白玉之

璽臣之屬籍懿皇所賜臣之師律先帝所命臣無逆節潛討何名陛下若厭逐功臣欲用文吏自可遷臣封邑以侯就第奈何加諸其罪孰肯無詞若以臣雲中之伐獲罪於時則拓拔思恭取鄜延朱全忠侵徐鄆陛下何不討之假令李孝德不忠於主伐之爲是則朱瑄時溥有何罪耶此乃同坐而異名賞彼而誅此使天下藩服强者扼腕弱者自動流言竊議爲臣怨嗟固非中興之術也且陛下阽危之秋則獎臣爲韓彭伊霍旣安之後罵臣曰戎羯蕃夷海內握兵立事如臣者衆矣寧不懼陛下他時之罵哉臣昨過燕軍以禮退舍匡威淺昧厚自矜誇乃言臣中矢石覆士卒致內外吠聲一發短謀競陳懼陛下君臣之分況命官選將自有典刑不必幸臣之弱而後取之儻臣延期挺命尙固一方彼實何顏以見陛下此則姦邪朋黨輕弄邦典陛下凝旒端扆何由知之今張溶旣以出軍微臣固難束手臣便欲叫關輕騎面叩玉階訴邪佞於陛下之彤墀納詔命於先皇之宗廟然後束身司敗甘處憲章時克用令所擒中使奉表表至而溶敗朝廷鋒震制曰漢武因恭儉富庶之後建置朔方孫弘沮之十不得一而良史以弘有宰相體者誠以愛人治國爲先拓境開疆爲末及孝宣值雄才削平之餘將議北征魏相爭之五將等罷果致中興號爲賢輔況朕承天厭兵戈之後人思休息之時敢望臯夔共成堯日庶幾孫魏粗及漢年苟易於斯如何倚注光祿大夫門下侍郎兼戶部尙書同中書門下平章事上柱國清河郡開國伯食邑一千二百

戶充河東行營諸道兵馬招討制置等使張溶早以盛名稱爲奇士繇是再加徵用委以鈞衡謂其必致
小康克勝大任而乃罔思守道但欲邀功用不詭之誦謀起無名之兵革自云一舉止在旬時堅請抗論
勢莫能奪輕葛亮渭濱之役小裴度淮右之行經歷寒暄耗費百萬虛誕彰于朝野詐詭布於華夷橫草
蔑聞燎原愈急俾擁旄乘驛之使囚在虜庭勤王奉國之軍懷歸本土忘廊廟之威重結藩屏之仇讐欲
使海內生靈竭其貢賦不獨河中郡邑蕩爲丘墟潛生厲階欲誰歸咎於戲徵晁錯之故事思王恢之舊
章國有明文爾當何追尙以愛人以禮理體宜然廉鎮劇權武昌善地宜罷樞軸之務仍停支度之司勉
自思惟以逃後命可檢校戶部尙書鄂州刺史武昌軍節度觀察等使尋貶連州刺史馳驛發遣行至藍
田關不行留華州依韓建時朝廷微弱竟不能詣乾寧二年三鎮殺韋昭度帝召孔緯欲大用亦以溶爲
兵部尙書又領天下租庸使三年天子幸華州罷溶使務守尙書右僕射上疏乞致仕授左僕射致仕乃
還洛陽居於長水縣別墅潛雖退居山墅朝廷或有得失必章疏上言德王廢立之際溶致書諸藩請圖
匡復王師範青州起兵欲取溶爲謀主事雖不果其迹頗泄朱全忠將圖篡代懼溶搆亂四方不欲顯誅
密諷張全義令圖之乃令牙將楊麟率健卒五十人有如劫盜圍其墅而殺之天復三年十二月晦夜也
丞寧縣吏葉彥者張氏待之素厚楊麟之來彥知之告溶第二子格曰相公之禍不可免耶君宜自爲謀

格溶父子號咷而已溶謂格曰留則併命去或可免汝自圖之勿以吾爲累冀存後祀也格拜辭而去葉彥率義士三十人送渡漢江而旋格由荆江上峽入蜀王建僭號用爲宰相中興平蜀任圖攜格而還格感葉彥之惠訪之身已歿而厚報其家溶第三子竄於楊行密自乾寧之後賊臣內侮王室寢微昭宗不堪凌弱欲簡拔奇材以爲相然採於羣小之論未嘗獲一人登用之徒無不爲時嗤誚

朱朴者乾寧中爲國子博士腐儒木強無他才伎道士許巖士出入禁中嘗依朴爲姦利從容上前薦朴有經濟才昭宗召見對以經義甚悅卽日拜諫議大夫平章事在中書與名公齒筆札議論動爲笑端數月巖士事敗俱爲韓建所殺

鄭繁者以進士登第歷監察殿中倉戶二員外金刑右司三郎中家貧求郡出爲廬州刺史黃巢自嶺表還經淮南剽掠繁移黃巢文牒請不犯郡界巢笑而從之一郡獨不被寇天子嘉之賜緋魚袋罷郡有錢千緡寄州帑後郡數陷盜不犯鄭使君寄庫錢至楊行密爲刺史送所寄於京師還繁繁善爲詩多侮劇刺時故落格調時號鄭五歇後體初去廬江與郡人別云唯有兩行公廨淚一時灑向渡頭風滑稽皆此類也王徽爲御史大夫奏繁爲兵部郎中知臺雜遷給事中賜金紫僖宗自山南還以宰相杜讓能弟弘徽爲中書舍人繁以弘徽兄在中書弟不宜同居禁近封還制書天子不報繁卽移病休官無幾以左散